

汾州府志卷之三

山川上

府境之山以汾水分東西西山自寧武府五寨縣南六十里蘆芽山迤邐而南在府屬臨縣湫水之右者曰紫金山東南距縣治四十里西麓之谿澗四西入黃河東麓之谿澗三東入湫水皆山夾水澗悉紫金山枝麓也山勢嵯峩時有雲氣

山舊建聖水殿殿左右壁間有穴二大纔容手相去二尺許西曰雨穴東曰風穴風穴閉不敢啟雨穴值旱禱手探得水卽雨或偶探之時獲水珠鈿石諸物

汾州府志

卷三 山川

一

曰鳳凰山卽臨縣城所倚西山城跨其上

曰龜山在城西南一名長壽山鳳凰山之陽龜山之陰有澗名牛澗二山之脈北連紫金山

臨縣南十里曰白弼崖懸崖百尺上有佛字縱橫三尺似聖書然志稱舊說佛音弼爲佛盼佛時仔肩之佛縣南五十里曰三交南山相傳北魏孝文帝過此見有異氣遂鑿斷來脈建廟壓之時荆棘宵衣怒折其刺至今此地棘刺獨無勾爲異此二山皆在湫水之右

湫水之左曰赤峒嶺今呼赤堅嶺西南距臨縣治七十

餘里魏書尔朱兆傳大掠并州城內獻武王進討之兆遂走於秀容王又追擊度赤硤嶺破之衆並降散山與永寧州接境南距州治二百二十里其北爲嵐縣界

嵐在

縣南九十里

一名離石山離石水所導源也南流轉西入於

黃河

離石水之右湫水之左以南曰大小連枝山西距臨縣治七十里山下有澗名喬子川西入湫水

曰黃龍山西距臨縣治五十里有谿澗西導者二入於湫水

曰漢高山西北距縣治五十里山下有澗名大峪水西

汾州府志

卷三 山川

二

入湫水山與永寧州接境南至州治百一十里史記韓王信列傳高帝七年信亡走匈奴匈奴使左右賢王將萬餘騎與漢兵戰漢大破之追至離石匈奴復聚兵樓煩西北漢令車騎擊破匈奴山上有高帝廟下有祠曰仙姑祠相傳三宮嬪葬焉非所詳也

曰雲山西北距臨縣治三十餘里山下有澗名小峪水西入湫水

臨縣東四十里曰中腳山產石炭縣東南八十里曰招賢山有鉄冶產石炭土人造磁器曰火山曰樊包頭山並出石炭土人造磁器此四山皆離石水以西

湫水之左在臨縣境者

曰積翠山南距永寧州百四十里金史地理志石州方山縣貞祐四年徙治於積翠山是也今俗呼方山嶺

曰馬頭山東南距州治三十里相傳晉豫州刺史祖逖嘗駐軍此山有廟碑

曰興雨山東南距州治二十里有雲繞是山則雨隨之其山三峰秀舉以狀類俗呼筆架山

曰匾斗山東距州治十五里山高插天傍有岩曰叶斗岩其下泉名靈通月窟泉山上有舊寨廢址俗呼安國王寨

汾州府志

卷三 山川

三

曰南山東距州治百二十里山在故孟門縣之南其頂有泉名靈泉高崇熙靈泉寺記云南山峰巒插天下臨黃河有泉一道飛瀑山椒潑洄殿宇導流齋廚旱取水禱之輒應金大定間於茲灌水入田嘉禾合穎

曰馬岩山東距州治百里有泉資灌溉

州北五十五里曰石版門山崖壁陡峻山半有穴如兩扇開闔狀州西二里小山曰虎山高百步州西九十里曰八盤山此三山皆離石水之西在永寧州境者

離石水之左曰步佛山南距州治百六十五里宋史王

忠植傳云叛將趙惟清執忠植械詣其右副元帥撒離曷不能屈使甲士引詣慶陽城下諭使降忠植大呼曰我河東步佛山忠義人也爲金人所執使來招降願將士勿負朝廷堅守城壁忠植卽死城下

曰孝文山南距州治百七十里與交城縣接境

在交城縣西北

百六十里高四十里上無林木每雨則山半雲凝有北魏孝

文帝碑長丈餘廣五尺許文字剥落其谿澗東導逕文谷是爲文水會於汾川

曰呂梁山西南距州治百三十里與交城縣接境

在交城縣

西北百五十里高插霄漢俗呼骨脊山鄙語云舊傳山半有蛤

汾州府志

卷三 山川

四

蠡及繫舟鉄絙少東曰鉄鑄山舊傳有鉄環並非所詳究也山有漢劉耽碑可辨者六十字言舜禹治水時事山頂有小廟刻記至元年號水地記圖注曰禹貢冀州旣載壺口治梁及岐舊說云壺口在冀州梁岐在雍州從東循山治水而西蘇子瞻云梁岐二山在雍州今於冀言之者因河而言非以二山爲冀州之地也曾彥和云壺口梁岐一役也其施皆同時不可分言於二州故併言於冀也王伯厚困學紀聞云治梁及岐若從古注則雍州山距冀州甚遠壺口太原不相涉晁以道用水經注以爲呂梁狐岐晁氏王氏之說是也考禹貢之文

自西而盡於東故先壺口次梁岐次太原岳陽次覃懷次衡漳或舉山或舉地梁岐之西水歸於河梁岐之東水歸於汾此二山爲汾川以西羣山自北而南之脊舉之以見汾西河東其地就治而太原則見汾東之地就治岳陽在汾東沁西覃懷則沁東而南近河衡漳則漳水過臨漳而入河北注觀此數語冀州所宜治者全具於是不得謂因壺口一役兼及河西雍州也况韓城之梁山雖近河而渭北之岐山遠隔在漆沮涇水之西誠使越漆沮涇水至乎岐下則雍州自渭以北所當治者幾於備舉又於雍州言涇屬渭汭漆沮旣從荆岐旣旅

汾州府志

卷二 山川

五

此三語爲複文矣禹貢先分九州後復統記山川分者定其疆域合者見其條貫獨於發端之始以雍州山隸冀州何取乎先分後合示人以截然有限域者而寔淆溷其間也然謂禹貢梁岐卽今永寧州之呂梁孝義縣之狐岐者亦有未盡如淮出桐柏渭出鳥鼠後人舉其枝山曰淮出胎簪渭出南谷蓋古者統以一名後人徃徃隨地殊稱今考孝文呂梁劉王嶧諸山寔一山之所盤迴薛頡狐岐高堂玉泉諸山亦一山之所盤迴禹貢之梁岐統名也今之呂梁狐岐特其中之一耳

蔡氏書傳云梁岐皆冀州山梁山呂梁也在今石州

離石縣東北爾雅云梁山晉望卽冀州呂梁也呂不
韋曰龍門未闢呂梁未鑿河出孟門之上又春秋梁
山崩左氏穀梁皆以爲晉山則亦指呂梁矣酈道元
謂呂梁之石崇竦河流激盪震動天地此爲禹旣治
壺口乃治梁也岐山在今汾州介休縣狐岐之山勝
水所出東北流注於汾酈道元云後魏於狐岐置六
壁防離石諸胡因爲大鎮今六壁城在勝水之側寔
古河逕之險阨二山水所經治之所以開河道也
先儒以爲雍州梁岐非是閻百詩尙書古文疏證云
壺口在今吉州西七十里與河津縣西北三十里之

龍門相連與隔河之梁山對峙公羊傳梁山河上山
穀梁傳梁山崩壅遏河三日不流經文遂連類而書
寔有出於某州某山常例之外者又元和志京兆府
奉天縣有梁山今乾州西北五里之梁山是也志言
山卽禹貢治梁及岐周本紀古公亶父踰梁山止於
岐下及秦置梁山宮皆此山蓋山勢紆迴扶風岐山
二縣之境經凡云及皆相近之辭以梁山屬此說亦
可通岐山在今岐山縣東北十里縣在鳳翔府東五
十里志稱府居四山之中五水之會五水汧也渭也
漆也岐也雍也岐水入漆雍水合漆水入渭汧水漆

水各入渭

此別一漆水非禹貢之漆沮

應是治此羣水注渭耳胡

拙明禹貢錐指云治梁所以終壺口之事除河患也其遂及岐者何蓋治梁已畢若身遽渡河而東則東方之事正多不能速還治雍當在數年之後而梁岐之間其於帝都事勢當日必有甚切而不容緩者故治梁之餘乘便施功及岐而止又洪水初平艱食未奏冀田僅第五等而梁岐之間去帝都最近田既膏腴轉輸又便禹甸梁山之野通渭水之漕其爲帝都艱食計也切矣及岐而止者蓋岐西地高仰洪水不爲災而東方事急亦無暇西畧故也案蔡氏說本晁

以道而引證多謬閻氏胡氏更申舊說以梁岐爲雍州山夫禹貢先分別九州初非於其間又牽合治水之先後緩急也使冀州施功西兼及雍且不啻大半治之則南亦可兼及豫東亦可兼及充豈無相連之勢施功同時者乎至推言雍便轉輸論益密而益鑿矣百詩於困學紀聞所云距冀州甚遠辯之曰梁山與壺口止隔一河耳不得謂甚遠考伯厚之言乃以自梁及岐其地連延而西爲甚遠不當偏舉一梁山議其語有滲漏百詩拙明皆深於考訂者咸謂蔡傳爲非固失在蔡氏不在晁以道蔡氏一引爾雅左氏

穀梁證晉山宜屬冀州不知春秋時自魯文公十年
晉人伐秦取少梁梁山由是入晉迨後三晉既分自
河以西濱於洛猶屬魏地少梁之梁山寔河西大山
故晉望祭之列國望祭山川及晉河東望祭之山爾
雅絕不一言而獨曰梁山晉望也正以河西近秦故
特言之成公五年梁山崩壅遏河三日不流晉君召
伯宗而問焉皆非離石縣呂梁一引呂覽語出尸子
淮南鴻烈亦襲之所稱呂梁未鑿雖後人失其所在
而離石縣之呂梁西距河百五十餘里隔越重山不
濱於河無事疏鑿也一引酈道元水經注其本文云

河水左合一水出善無縣故城西南八十里西流歷
於呂梁之山而爲呂梁洪其巖層岫衍澗曲崖深巨
石崇竦壁立千仞河流激盪濤涌波襄雷奔電洩震
天動地昔呂梁未闢河出孟門之上蓋大禹所闢以
通河也司馬彪曰呂梁在離石縣西今於縣西歷山
尋河乃無遏阻至是爲河之巨嶮卽呂梁矣在離石
北以東可二百有餘里後人以保德州西天橋峽爲
道元所謂呂梁洪就水經注自北而南之次考之地
望適協其地有禹鑿之跡河自故東勝州境轉而西
南流八十里至河曲縣西北轉而西流九十里逕天

橋峽下至保德西五十里折而南逕興縣西又南百七十里至臨縣界道元言呂梁洪在離石北以東可二百餘里蓋據黃河至離石縣界爲言因西流乃轉南故曰以東其指天橋峽無疑司馬彪言呂梁在離石縣西者卽今永寧州東北之呂梁徒因離石縣有呂梁山而河行離石之西故云在縣西寔未深考之言道元引而辯之則以離石西界河無遏阻故溯流而上以求其地是道元以尸子呂覽淮南所言呂梁不在離石而遠在其北也蔡氏援以證呂梁在離石正與其說相刺謬一言岐山在介休縣取山海經狐

岐之山勝水出焉而東北流注於汾水者綴其下又引酈道元水經注按之本文乃云勝水西出狐岐之山東逕六壁城南魏朝舊置六壁於其下防離石諸胡因爲大鎮勝水又東合陽泉水又東逕中陽故城南又東合文水文水又東南入於汾是山海經水經注之狐岐在今孝義縣西宋熙寧五年省孝義入介休元祐元年復置孝義至蔡氏時已爲金地無所廢置當據元祐以後言在今汾州孝義縣不當據前此熙寧元豐十餘年間繫之介休也若介休東南洪山俗以爲狐岐其泉源俗亦呼爲勝水則又隔越汾水

其下言今六壁城在勝水之側寔古河逕之險阨二
山水所經治之所以開河道也意以六壁城爲防
守西來渡河而東之津要不知北魏初河東岸離石
吐京之地萬山簇擁悉匈奴五部餘衆所居憑恃山
險未能卽平至狐岐以東汾川左右地勢平坦連接
太原本漢太原郡地故於此置六壁立爲鎮戍以防
狐岐以西黃河以東山寇西距黃河三百餘里不可
謂爲河逕之險阨呂梁狐岐之西始爲今臨縣永寧
州寧鄉縣山在三州縣之東而曰河水所經治之以
開河道將置此三州縣峻峯鉅嶺萬山簇擁者於何

汾州府志

卷三 山川

十

地乎

曰勒臺山西南距州四十里相傳石勒嘗屯兵於此
曰伏盧山西距州治二十餘里五朝志修化縣有伏盧
山是也北周大象中置盧山縣因是山以名隋大業初
省入修化

曰雲鳳山南距州治二里高百步山有古墓相傳陳希
夷墓非所詳究也華山之希夷峽舊傳希夷葬處矣
自呂梁山迤而東南曰劉王嶂西少南距州治百里高
八里盤踞二十二里上有池曰飲馬潭劉淵都離石時
嘗居此故名其左右谿澗右澗爲州之東川入離石水

以達河左澗入文水以達汾山之東麓接交城縣界在交
城縣西百八十里自是而南左右汾陽永寧之間西山之正脊也

山脊之右曰拓拔嶺西距州治七十里山下有泉曰馬跑泉上有古塚相傳北魏孝文帝陵也無可證實
曰寶豐山西距州治六十里巉巖壁立亦呼尖山有巨石袤丈餘狀類龜一人踐之則動衆相與踐之則否俗傳以爲異

循山脊而南曰黃櫨嶺東距府治六十餘里西少北距永寧州治百有五里或言卽魏書序紀稱將從西河鑿汾州府志
谷南出者也未聞其審

卷三 山川

十一

吳城驛水之左以南曰九鳳山西距州治五十里有石洞曰白馬洞入里許有獨木橋飛石燕直下有梯偃仰旋轉而進忽寬廠如屋怪石萬狀又進有圓石自頂倒懸去地三尺許名石鐘擊之鏗然有聲又進得池二一色白曰白龍池一黑如墨曰黑龍池又一池曰蓮花池頂上水滴垂垂而下祈禱獲以入瓶輒應又進其穴九道岐分深不可測相傳見一白馬日食田禾逐之入洞蹠跡猶存殆如廣武之馬蹠谷天馬徑矣古碑云九鳳山黃帝之別宮又一碑云赤松子煉丹之所非所詳也

洞前爲唐貞觀中尉遲敬德監造廟殿洞口時吐雲霧
晉高祖禱雨而應天福元年詔封淵濟仙洞勅樞密使
桑維翰書額山與望仙坡對峙坡俗呼韓仙山掌相傳
東萊韓中元往來是坡採蒼朮黃精服之身輕
曰龍山卽州治南山高一里山徑盤紆下有神醫華陀
廟其井泉名華君井病者祈禱取水

州北百九十里曰龍慶山上有佛寺浮圖俗傳尉遲
敬德所造呼爲尉遲塔州北百六十里曰三掌崖三
峰插天明晉藩牧地在其下土人呼官地裏州北百
二十五里曰銅柱山高千仞山半有涌泉上有寺名

汾州府志

卷三 山川

十二

迎曦寺州北百一十里曰龍王山土人呼爲北頂有
龍王廟州北百一十八里曰黑龍洞山有鉛礦上有
黃帝廟州東北七十里曰龍神山多五色石質溫潤
東北三十里曰胡公山此七山皆離石水之左在永
寧州境者州東南五十里曰尖陽山上立堡以備警
山之東與寧鄉縣接境

在縣東北
三十里

有泉西流入寧鄉

水

山脊之左枝麓岐分在汾陽縣境者曰謁泉山南距府
治四十里隱泉水出焉東入文水水經注曰俗云暘雨
愆時是謁是禱故山得其名非所詳也其山石崖絕險

壁立天固崖半有一石室去地可五十餘丈爰有層松飾巖列柏綺望惟西側一處得歷級升陟頂上平地一十許頃括地志謁泉山一名隱泉山在汾州隰城縣北四十里考北魏太和八年置西河郡治茲氏城茲氏本漢太原郡之屬縣也後人緣名傳合莫能稽遠遂以爲子夏居西河教授跡在於斯故是山俗呼子夏山禮記檀弓篇曾子稱退而老於西河之上鄭康成云西河龍門至華陰之地蓋河上據河而言不指郡縣張守節始舉西河郡謁泉山石室引隨國集記云此爲子夏石室退老西河居此有卜商神祠李吉甫元和郡縣圖志汾

州西河縣下云下商祠在縣北四十里方道元作水經注時西河郡治咸知新在此地故言子夏設教但求之夏陽邵陽間河水篇注云岨谷水東流側谿山南有石室因阿結牖連扃接闔昔子夏教西河疑卽此也而無以辨之谿水又東南逕夏陽縣故城北東南注於河陶渠水東南逕漢陽太守殷濟精廬尚在俗謂之子夏廟其水又東南逕夏陽縣故城南又東南入於河徐水東南逕子夏陵北東入河河水又南逕子夏石室東南北有二石室臨側河崖卽子夏廟室也道元所記者如是而於謁泉山及汾水文水絕不涉及明此地距河遠無

庸傳合耳沿及隋唐習聞郡名不復責實卜子之跡在龍門西河者移而虛加之北魏以後西河郡矣

曰青龍山東南距府治四十里孤峰特立羣山環之左右谿澗流出山頂有泉曰甘泉

曰白彪山東南距府治二十五里相傳遠古騶虞見於此山白虎黑文其麓曰壺盧谷原公水出焉東南入文水谷有龍橋洞方廣十丈許闢兩巖間石梁橫續懸溜滴池不絕南爲羊耳山石巉峰聳林茂泉飛水經原公水出茲氏縣西羊頭山或云白彪山卽羊頭山之異目也今別有山名羊頭山土山載石東距府治十五里原

汾州府志

卷三 山川

十四

公水經其下

曰比干山東南距府治百餘里元和郡縣圖志西河縣比干山在縣北百一十里是也

黃櫨嶺之東曰向陽峽東距府治三十五里古金鎖關在焉巖險插天中斷如闢延袤三十餘里有澗水出峽東流入文水

曰鶴鳴洞東南距府治十里舊曰西岩古洞

曰石室山東距府治三十里山多巖洞

舊志云石室山有空王佛岩麻衣仙洞空王佛後化介山故今以抱腹巖爲東岩而以此爲西岩麻衣仙

姑汾州任氏女碑記稱生於唐貞觀元年七月廿有六日不願婚嫁披麻衣入洞中因以名其洞旱禱輒應

曰萬戶山東距府治二十里高八十丈延袤二十里頂平曠又謂之西岡舊傳趙所封離石侯石嵩葬此山下今無可考

曰石盤山東北距府治十里其高峯俗呼西頂

曰將軍山一名柏山東北距府治十七里舊傳離石侯牙將趙鼎號白馬將軍戰死此山民收葬山下故名山與石盤山相連

汾州府志

卷三

山川

十五

府治西三十里曰石婆神山相傳山無水泉有老嫗曰遠汲以濟人沒而爲神建祠山上其山與萬戶山相連府西五十里曰柏山此二山皆山脊之東在汾陽縣境者

西山之正脊南行盤踞汾陽孝義寧鄉三縣境者曰薛頡嶺高五里許東北距府治九十餘里西距寧鄉縣治五十里東南距孝義縣治百里善利渠金沙水俱導源是嶺東入文水其西澗谷之水西入寧鄉水
自黃櫨薛頡而南其西麓止於寧鄉水之東曰寧陽山南距寧鄉縣治二十里俗呼朱店山縣境皆山惟北抵

永寧州爲平川是山乃諸水之屏障

曰蕉山西距縣治三十里山下有泉曰蕉泉隱見不常
值歲旱則大涌而出縣境耕山爲田灌溉所不及惟恃
雨澤故土人不樂是泉通流

曰柏窠山西距縣治十里有二泉冬夏不增減清冽味
甘可以已疾

曰卧龍岡西距縣治一里山勢委婉舊時多林木

曰泉子山西北距縣治三十五里崖臨寧鄉水之阨有
二泉自南崖下涌出

曰樓子臺山西北距縣治三十二里山勢疊峻望之若

汾州府志

卷三 山川

十六

層樓然山有洞高八尺廣二丈深二十餘丈曰劉公洞
塑像洞內寧鄉水逕其西

曰蜜蜂崖西北距縣治三十里壁立如削寧鄉水逕其
下

曰仙明山西北距縣治十里山下有洞深不可測曰仙
明洞禱雨輒應

曰鷹嶺北距縣治二里許俗呼虎頭山寧鄉水環繞其
西而北

寧鄉縣東六十里曰黑嶺縣東南十里曰百家峪縣
東南三十五里曰黃嵩嶺此二山皆在山脊之西寧

鄉水之東屬寧鄉縣者

薛頡嶺之左曰龍隱山東南距孝義縣治六十里巒壁
巍峩高三里許一名龍山其東南麓谿澗名賈壁水南
麓谿澗名版峪水皆東北入金沙水

山西通志云隱龍山有象王峰蓮花峰雲蓋峰金沙
河半月池諸勝

與薛頡嶺連岡而在南曰狐岐山晁以道釋禹貢治梁
及岐謂冀州之岐山卽此山也東距縣治百里高七里
許其南麓有原曰盤重原原東谿澗俗呼孝河北川者
也東入勝水

汾州府志

卷三

山川

十七

孝義縣新志云薛頡狐岐寔兩山薛頡跨汾陽寧鄉
孝義三縣之界狐岐則全在孝義境內山西通志誤
云狐岐一名薛頡

由盤重原左轉其旁起者曰白雀山東距縣治七十餘
里山有池土人呼黑龍池其東曰烏雞山東距縣治六
十餘里斜坡東下行三十里許而盡山亦有所謂黑龍
池者池上有廟官民禱雨則於此

與白雀山連岡而在南曰高唐山東北距縣治七十餘
里其南麓谿澗俗呼孝河南川者也唐書地理志武德
二年置高唐縣貞觀元年省然則是山蓋唐初高唐縣

境

與高唐山連岡而南。池東曰玉泉山，高三里，東北距縣治六十餘里。山之東北麓，勝水出焉。東北入文水，俗呼左水者也。其東麓，玃谿之水出焉。南麓，則漕谿之水出焉。並東北入勝水，自薛頡至玉泉，寔一山之高下盤屈。古通謂之狐岐山，故山海經稱狐岐之山，勝水出焉。而東北流，注於汾水。若今之所謂北川，乃東南而非東北。亦惟左水逕六壁，南若南北二川，則合而逕六壁之北。水經注可證也。然山海經言注汾，而水經注言注文水，則因汾水東西轉徙，驗之近事，數年以前，原公水以下

汾州府志

卷三 山川

十八

諸澗皆自達汾川，不與水經注協。今則皆入文水，一道元所見矣。

由玉泉山岐分東，池北曰柏山，東距縣治五十餘里。峰巒峭拔，一名金斗山。勝水逕其陽，高唐山之水逕其陰。自玉泉山池南，則爲靈石縣北山東，盡於汾之西岸。盤重原之西，循岡阜池，邇而南，地名弓家灣。山之正脊也。在縣西南百四十三里左有澗，東南由隰州至靈石縣入汾。右有澗，自遠望山東南麓而來，西爲寧鄉水，又南枝麓岐分而西者，曰可寒堆，卽遠望山也。俗呼上殿山，高十里。許東北距縣治百六十里，自山而西北八十里至寧鄉。

縣治寧鄉水導源山之谿澗峰巒峻拔山有可汗廟元和郡縣圖志溫泉縣遠望山一名可寒堆在縣西七十里周迴九十五里

孝義縣西南百二十餘里白家莊諸村之山自弓家灣迤邐而來東行起橫岡鉅坡高出柏山高唐玉泉諸山之上南北縣衍二十餘里東西四十餘里山高巒複村庄稀少故山盡無名山北有谿澗西自弓家灣北導源東流三十里繞山而南經隰州靈石入汾山南有谿澗西自隰州北境界野高泉導源東流四十里復入隰州界又南有澗自黑龍溝導源東流十餘

汾州府志

卷三 山川

十九

里亦經隰州合野高泉之水歸汾山西有谿澗南自上殿山東南麓導源經弓家灣南而西流入寧鄉縣界歸黃河此弓家灣而南白莊村諸山之西爲西山正脊所過之大致也上殿山之旁曰佛寶山上有積石瑰琦駘目寔連於上殿山一石崖耳

寧鄉水之西曰雲集嶺北距寧鄉縣治六十五里縣之鎮山也

曰八道岡東北距縣治五十五里循山之西谷至煖泉鎮其東澗谷有泉流合車轍泉

曰車轍山北距縣治三十七里有泉東入寧鄉水

曰車鳴峪西北距縣治三十五里有泉而微細合八道
岡車轍山之泉入寧鄉水

曰避兵臺北距縣治四十里高千丈周盈三里一名沒
虎臺下有清泉石室

曰屏風山北距縣治三十一里寧鄉水逕其下壁崖峭
舉展舒如屏

曰鳳凰山卽寧鄉縣城所倚西山也跨山爲城

曰仙童山在永寧州境東北距州治四十餘里有石洞
洞口廣丈餘少進旁有一穴纔容身俯偃乃入復開廠
內石牀一泉一甚清冽相傳昔時見童子晨樵採夕入

汾州府志

卷三 山川

二十

是洞故山以名焉洞口之上有廟曰應雨龍神廟

曰石門山東北距縣治百四十里黃河逕其西煖泉鎮
之水逕其南

曰柏林山東距縣治九十里一名鳳翅山鋤溝鎮南山
也北臨澗水山多古柏有松一株

縣西十里曰天原山縣西南九十里曰寨溝山此二
山皆在寧鄉水之西黃河之東屬寧鄉縣者

寧鄉石樓二縣山之正脊盤旋其東右枝岐分迴環北
轉故二縣之水皆北流屈西以歸黃河蓋山勢使然也
介於孝義石樓之間曰黃雲山東距孝義縣百六十餘

里西距石樓縣七十里

二縣以山脊分界自黃雲山崖正北至寧鄉縣治九十五里

壁峭舉風氣寒冽

其西曰石羊山西距石樓縣治二十里山多枯木一名

枯木山下有小澗來自縣東五十里西入龍泉水

與黃雲山相連而在南曰牛心岡西距縣治六十里

其南曰石樓山西北距縣治六十里元和郡縣圖志云

開皇十八年改吐京爲石樓縣因縣東石樓山爲名也

石樓山在縣南六十里

龍泉水之西曰翠金山北距縣治三里巒聳林密一名

臺駘山上有臺駘廟

汾州府志

卷三 山川

二十一

曰煖泉坡東北距縣治四十里溫泉川出焉東北入龍泉水

曰九重山東距縣治七十里山下有泉俗呼馬剖泉宋

呼延瓚故里在焉有巖曰金甲巖俗傳呼延瓚於此得

甲故名

曰石鼓山東距縣治三十里有平石二一似琵琶一類

鼓形

曰老子岩東距縣治二十里岩上清泉滴瀝冬成冰柱

高四丈有奇

曰團圓山東南距縣治五十里山峰高舉有漢高祖廟

半坡有泉可資灌溉太平寰宇記土軍故城在團圓山下今無復遺蹟

曰飛龍山東南距縣治五十里山崖峻疊

以上右河左汾諸山在臨永寧汾陽孝義寧鄉石樓六州縣界中者

汾東之山自寧武府治西南四十里分水嶺迤邐布分東南至樂平縣西沾嶺右轉歷八賦嶺侯甲嶺至府屬平遙縣之東曰盤石山西距縣治六十里有谿澗北流二十餘里散於原野

曰鹿臺山西北距縣治五十里嬰澗水出焉西北入侯

汾州府志

卷三 山川

二十二

甲水今其水西北流散於原野酈道元以山海經謁戾之山嬰侯之水當之文獻通考汾州平遙縣下云有鹿臺山有嬰澗水劉岵遊鹿臺山記云山無林木衆壑參差千岩一色頂上方石平置纍纍如九層臺鹿臺得名或以此峰

曰過山西北距縣治四十五里魏書地形志太原郡平遙縣下云有過山是也過讀如戈魯澗之水出焉西北流二十餘里散於原野其西爲戈嶺有谿澗東北入侯甲水

曰超山西北距縣治四十里鹿臺山以西至此皆古過

山也。超山之名起於唐天寶六年。以水經注證之。山卽汜山矣。其谿澗北入過嶺。水山有元遺山題名石云。己亥秋八月十有四日。自太原道往山陽。留宿於此。東山元好問裕之題。溫仁甫有後序。

曰天峻山。西北距介休縣治六十里。壁立萬仞。雲繞山半。其下雖雨而巔或無雲。

曰東洪谷。西北距縣治四十里。頂有泉曰懸泉。瀝石下注。似瀑布。岩下有潭。名白牛。泐山路險峻。直上三十里。始達於泐。爲潭者凡三。周五百餘步。深不可測。禱雨輒應。其西曰西洪谷。西北距縣三十里。

汾州府志

卷三 山川

二十三

山西通志平遙縣洪谷在縣西南。有白龍潭。又引武亮記。谷上通縣山。兩崖對峙。壁立千仞。巨潭天成。皎若明鏡。此所謂洪谷。卽介休縣之東洪谷耳。非平遙境。

曰蠶簇山。西北距縣治三十里。山勢高峻。以狀類故名。曰洪山。西北距縣治二十五里。有泉曰鸞鷲泉。資溉甚溥。山卽縣山之隨地異名者。俗以爲狐岐山。非也。曰縣山。北距縣治四十里。遞高四十里。有岩曰抱腹。岩羣峰簇擁。縣山之奧也。岩西曰鉄索嶺。援攀乃登。自嶺而西。至白雲洞。土人呼爲中岩。泉出崖壁間。其孔百餘。

狀若蜂藪名蜂房泉又有泉出下岩名下馬泉山勢懸
亘東抵沁源北接介休南跨靈石隸介休境者二十五
里以山脊界分其陽屬靈石其陰屬介休說者皆援介
子推事實之故又名介山左氏春秋言子推之隱不著
其隱於何所但曰遂隱而死晉侯求之不獲以縣上爲
之田曰以志吾過且旌善人遂隱而死者舉其終之不
可得言之求之不獲者隱固不復使人知也安知其隱
必猶在晉國中乎晉侯以縣上爲之田其地不出國中
之地或介推曾有子則授之其子或令人立其祠取租
稅供祭事而已史記則曰至死不復見介子推從者憐

之乃懸書宮門文公出見其書曰此介子推也吾方憂
王室未圖其功使人召之則亡遂求所在聞其入縣上
山中於是文公環縣上山中而封之以爲介推田號曰
介山在左氏無所謂介山也曰以縣上爲之田則地名
而非山名史記增成之曰縣上山中且以所封之田爲
其所隱之處其曰環縣上山中而封之將以爲子推入
居於此如項羽聞陳餘在南皮因環封三縣之事歟觀
陳餘後發三縣兵則三縣爲餘有介推未必受此縣上
山中食其租稅 所謂環封者乃空棄其地歟蓋戰國
時有抱木燔死之說子長所不取而屈原賦稱封介山

而爲之禁其語近是故本以爲說耳戰國秦漢之際異說紛起無足取信當據左氏之文正之至縣上地又見於魯襄公十三年晉侯於縣上以治兵及定公六年宋樂祁使於晉趙簡子而飲之酒於縣上獻楊楯六十於簡子皆地近晉都炎武以爲翼城縣西近之爲介子推田者亦宜在彼不在此

後漢書郡國志太原郡界休有界山有縣上聚水經注云王肅喪服要記曰昔魯哀公祖載其父孔子問曰寧設桂樹乎哀公曰否也桂樹者起於介子推子推晉之人也文公有內難出國之狄子推隨其行割

肉以續軍糧後文公復國忽忘子推子推奉唱而歌文公始悟當受爵祿子推奔介山抱木而燒死國人葬之恐其神魂貿貿於地故作桂樹焉吾父生於宮殿死於枕席何用桂樹爲余案夫子尚非璠璣送葬安能問桂樹爲禮乎王肅此證近於誣矣顧炎武日知錄云漢魏以來傳有焚山之事太原上黨西河鴈門之民至寒食不敢舉火然考之於傳晉悼公蒐於縣上以治兵使士匄將中軍讓於荀偃此必近國都之地又定公六年趙簡子逆宋樂祁飲之酒於縣上自宋如晉其路豈出於介休乎况文公之時霍山以

北大抵皆狄地與晉都遠不相及今翼城縣西亦有
縣山俗謂之小縣山近曲沃當必是簡子逆樂祁之
地又云今萬泉縣南二里有介山漢書武帝紀詔曰
朕用是介山祭后土皆有光應地理志汾陰介山在
南楊雄傳其三月將祭后土上廼帥羣臣橫大河湊
汾陰既祭行遊介山回安邑顧龍門覽鹽池登歷觀
陟西岳以望八荒雄作河東賦曰靈輿安步周流容
與以覽於介山嗟文公而愍推兮勤大禹於龍門水
經注亦引此謂太康記及地道記永初記並言子推
隱於是山而辨之以爲非然可見漢時已有二說矣

案今沁源縣北八十里有縣上關縣上城卽後漢書
之縣上聚也其地在縣山之南漢晉蓋屬界休縣後
代割入沁源說者謂介休南山盤踞深厚是以求而
弗獲若在萬泉者周圍僅十里未必不獲此未察春
秋傳初非言其入於縣上也二山皆屬傅合又平定
州東北九十里亦 縣山山有介子廟娘子關有妬
女祠以爲子推妹 縣山東麓有縣水北流入澤發
水喬宇觀縣水詩西嶺寒流繞澗斜離離石子帶晴
沙翼城縣西北十五里之縣山下有介子推廟志稱
土人傳晉文公所立

曰雀鼠谷東北距縣治二十里水經汾水又南過冠爵
津酈道元注云汾津名也在介休縣之西南俗謂之雀
鼠谷數十里間道隘水左右悉結偏梁閣道纍石就路
縈帶巖側或去水一丈或高五六尺上戴山阜下臨絕
澗俗謂之魯般橋蓋通古之津隘矣亦在今之地嶮也
考水經注所言谷之隘嶮今屬靈石縣境東接介休爲
入谷之口耳

介休縣東南四十里曰獅鼻岩高七十餘丈縣東二
十八里曰臧城山縣東南二十里曰太虛岩岩畔有
數石洞知縣李鍾盛介山分界碑記山南之坡爲陽

坡地名有北塔鈎紅巖村柏溝峪大小柏溝村介神
廟諸處屬靈石縣地山北之坡爲陰坡地名有說法
臺抱樓山陶圪塔饅頭山興地村等處屬介休縣地
俱以山嶺中脊陰陽爲界下以柏溝村興地村二溝
合流總渠水心爲界